

Convenio entre a Consellería de Educación, Ciencia, Universidades e Formación Profesional e a Asociación Galega de Corredores e Corredurías de Seguros, Agacose, para a impartición de formación profesional dual intensiva de alta especialización da familia de Administración e Finanzas

Santiago de Compostela, 29 de xuño de 2026

REUNIDOS

Dunha parte, don Román Rodríguez González, conselleiro de Educación, Ciencia, Universidades e Formación Profesional da Xunta de Galicia, en representación desta consellería, e de conformidade coas atribucións conferidas no artigo 34.1 da Lei 1/1983, do 22 de febreiro, de normas reguladoras da Xunta e da súa Presidencia e nos Decretos 42/2024, do 14 de abril, polo que se establece a estrutura orgánica da Xunta de Galicia e 44/2024, do 14 de abril, polo que se nomean os titulares das consellerías da Xunta de Galicia.

Doutra, don Pablo Lariño Noya, presidente da Asociación Galega de Corredores e Corredurías de Seguros, Agacose, que actúa en nome e representación da citada asociación, elixido como tal na Asemblea Xeral Extraordinaria do 23 de setembro de 2025.

Interveñen en función dos seus respectivos cargos e en exercicio das facultades que para convir, en nome das entidades que representan, teñen conferidas.

EXPOÑEN

1. Que a Lei orgánica 3/2022, do 31 de marzo, de ordenación e integración da formación profesional, especifica no seu artigo 55 que o carácter dual da formación profesional se desenvolverá mediante unha distribución adecuada dos procesos formativos entre os centros de formación profesional e as empresas ou os organismos equiparados, contribuíndo ambos ao logro das competencias previstas en cada oferta de formación, e que se promoverá a corresponsabilidade coa formación profesional dos centros e das empresas ou dos organismos equiparados.

No seu artigo 65 establece que todas as ofertas formativas de formación profesional, efectuaranse, con carácter xeral, baixo o réxime xeral ou o réxime intensivo, e no artigo 67 indica que o réxime intensivo caracterízase por unha duración da formación na empresa ou organismo equiparado superior o 35% da duración total da formación, participación da empresa ou organismo equiparado en máis dun 30% dos resultados de aprendizaxe e a existencia dun contrato de formación coa empresa.

2. Que o Decreto 20/2026, do 9 de marzo, polo que se establece a ordenación xeral da formación profesional do sistema educativo de Galicia, contempla:

- No seu artigo 3.d) entre os principios da formación profesional do sistema educativo de Galicia:
 - Articular a colaboración público-privada identificando as necesidades de formación e capacitación, as actuais e de futuro, implicando as empresas ou institucións na formación, así como nas actuacións de difusión e de orientación profesional do Sistema de formación profesional.
 - Dotar das mellores competencias docentes ao profesorado de formación profesional.
 - Garantir a excelencia na formación profesional de Galicia.
- No seu artigo 19 sobre as ofertas e formacións específicas, contempla que dada a estrutura modular dos graos D e E, e os seus niveis básico, medio e superior, poderanse autorizar ofertas deseñadas á medida do tecido produtivo de Galicia, consistentes en itinerarios formativos de graos D e E, do mesmo ou de distintos niveis, xa sexa de forma completa ou xa de forma parcial, ou engadindo módulos ou parte deses módulos. Estas organizacións formativas poderán constituír unha oferta en alta especialización.

3. Que a Asociación Galega de Corredores e Corredurías de Seguros e unha organización empresarial fundada no ano 1995 encargada de representar, defender e formar aos profesionais da mediación de seguros independentes dentro da Comunidade Autónoma de Galicia. Entre os seus asociados encóntranse empresas das catro provincias galegas.

4. Que a Consellería de Educación, Ciencia, Universidades e Formación Profesional e a Asociación Galega de Corredores e Corredurías de Seguros están dispostos a colaborar en todos aqueles aspectos que melloren as competencias do alumnado de formación profesional e se adapten ás actuais necesidades formativas do mercado laboral e así conduzan a unha óptima inserción laboral deste alumnado.

En consecuencia, ambas as partes acordan asinar este convenio, que se rexerá polas seguintes,

CLÁUSULAS

Primeira. Obxecto do convenio

O obxecto de presente convenio é establecer a colaboración no eido da formación profesional entre a Consellería de Educación, Ciencia, Universidades e Formación Profesional e a Asociación Galega de Corredores e Corredurías de Seguros, Agacose, para a impartición de ensinanzas de formación profesional dual intensiva de alta especialización da familia de Administración e Finanzas no IES Ricardo Mella de Vigo. Concretamente o ciclo formativo de formación profesional de grao superior de Administración e Finanzas que contará con formación de alta especialización en Seguros.

Esta formación impartirase de xeito compartido entre o centro educativo e as empresas pertencentes á Asociación Galega de Corredores e Corredurías de Seguros, garantindo a adquisición dos resultados de aprendizaxe establecidos para as ensinanzas conducentes á obtención do título correspondente. A empresa formará ao alumnado na porcentaxe de horas que figuren nas ensinanzas deste proxecto de FPdual.

Segunda. Autorización das ensinanzas

A Consellería de Educación, Ciencia, Universidades e Formación Profesional autorizará no IES Ricardo Mella a posta en funcionamento e organización, para o curso 2026-2027, do ciclo

formativo de formación profesional de grao superior de Administración e Finanzas en réxime dual intensiva que contará con formación de alta especialización en Seguros.

A Consellería de Educación, Ciencia, Universidades e Formación Profesional e a Asociación Galega de Corredores e Corredurías de Seguros deseñaran o itinerario formativo desta formación de alta especialización.

Terceira. Compromisos da Asociación Galega de Corredores e Corredurías de Seguros

Agacose seleccionará de entre os seus asociados ás empresas máis idóneas para acoller nas súas instalacións ao alumnado para a impartición da formación profesional dual intensiva referida na cláusula anterior. Este alumnado deberá cumprir os requisitos de admisión establecidos pola Consellería de Educación, Ciencia, Universidades e Formación Profesional.

Agacose colaborará coa Consellería de Educación, Ciencia, Universidades e Formación Profesional na selección do alumnado solicitante que cumpra os requisitos de admisión. Para tal fin, poderán realizarse entrevistas psicoprofesionais que permitan identificar a idoneidade das persoas candidatas en relación co perfil profesional que adquirirá o alumnado nas empresas ao longo do proxecto formativo de alta especialización. Estas actuacións serán realizadas por persoal da asociación xunto cunha persoa representante do centro educativo, de xeito que a selección garanta cubrir o número mínimo de prazas que a asociación se comprometa a acoller nas súas empresas asociadas.

Cuarta. Comisión de seguimento

Establecerase unha comisión de seguimento, control e supervisión, co obxecto de determinar a programación e o seguimento das accións previstas neste convenio.

Esta comisión reunirse cando se considere oportuno por calquera das partes e estará constituída por:

- Dúas persoas representantes da Consellería de Educación, Ciencia, Universidades e Formación Profesional, unha das cales exercerá a presidencia da comisión.
- Dúas persoas representantes de Agacose.
- Unha persoa funcionaria da Consellería de Educación, Ciencia, Universidades e Formación Profesional que actuará como secretaria.

Quinta. Vixencia do convenio

O convenio terá a vixencia de catro cursos académicos, podendo prorrogarse, pola mesma vixencia, por acordo expreso das partes mediante a addenda correspondente. En todo caso, coa limitación establecida no artigo 49.h) da Lei 40/2015, do 1 de outubro. Non obstante, o convenio poderá denunciarse por calquera das partes; a denuncia deberá realizarse por escrito e con tres meses de antelación á data na que se queira poñer fin á relación entre as partes. En todo caso, a supresión das ensinanzas realizarse curso a curso ata a súa extinción definitiva.

Sexta. Extinción do convenio

O presente convenio extinguirase polo cumprimento das actuacións que constitúen o seu obxecto ou por incorrer en causa de resolución.

No caso de resolución do convenio, as partes quedan obrigadas ao cumprimento dos seus respectivos compromisos ata a data en que esta se produza.

Serán causas de resolución:

- a. Transcurso do prazo de vixencia sen haberse acordado prórroga.
- b. O acordo unánime das partes.
- c. O incumprimento das obrigas e compromisos asumidos por algunha das partes.
- d. Por declaración xudicial de nulidade.
- e. Por calquera outra causa prevista nas leis.

Sétima. Obrigas económicas

Da aplicación deste convenio non se derivará contraprestación económica algunha entre as partes asinantes do mesmo.

Oitava. Protección de datos

De conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais, o alumnado, os centros educativos e a asociación que por razón das actividades previstas neste convenio teñan acceso a datos de carácter persoal, non disporán dos mesmos con finalidade distinta á esixida polas accións formativas.

Neste sentido, haberá que atender ao contemplado no Regulamento (UE) 2016/679 do Parlamento Europeo e do Consello de 27 de abril de 2016 relativo á protección das persoas

físicas no que respecta ao tratamento de datos persoais e á libre circulación de estes datos e polo que se derroga a Directiva 95/46 CE (Regulamento xeral de protección de datos).

Novena. Publicidade do convenio, transparencia e bo goberno

A firma deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 9/2013, do 9 de decembro, (BOE 10-12-2013) de transparencia, acceso á información pública e bo goberno e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décima. Carácter administrativo do convenio

O presente convenio de colaboración posúe carácter administrativo por razón do contido e materias sobre as que o mesmo versa, as cales ao abeiro do disposto na Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, o exclúen do seu ámbito de aplicación, sen prexuízo da aplicación dos principios desta lei para resolver as lagoas ou dúbidas que a súa aplicación suscite, conforme ao contemplado no artigo 4 da citada lei.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.

E en proba de conformidade co exposto, as partes asinan o presente convenio na data da súa sinatura dixital.

O conselleiro de Educación, Ciencia, Universidades e Formación Profesional

Román Rodríguez González

O presidente da Asociación Galega de Corredores e Corredurías de Seguros

Pablo Lariño Noya